

## ADAM - UN EMIGRANT DAL CAMERUN

Gianfranco Gallo

*Adam*  
*Un emigrant dal Camerun*



*Adamo*  
*Un emigrante del Camerun*

### CE LIBRI ISAL?

"Adam - Un emigrant dal Camerun" al è un libri bilengâl, talian e furlan, scrit di **Gianfranco Gallo**.

Si trate di une storie che o podaressin definî une novele, ni tant lungje, ni tant curte, che prime par furlan, e dopo par talian, e conte la storie di Adam, che dal Camerun al rive in Friûl a cirî furtune. Al è stât publicât cul jutori de Pro Loco di Gjalarian zaromai un pâr di agns fa e al si compon di 142 pagjinis.

### MA CUI ISAL L'AUTÔR?

Gianfranco Gallo al è dal '48, al è di Gjalarian e al è un nestri **contecurtâr Plume di Ingjustri**, che cuant che al pues nus regale simpri cualchi biele conte. Al è di sigure plui cognossût pes poesiiis, stant che no dome o vin let achì il so libri **Amôr une peraule tal me cor**, ma al è stât di spes premiât in concors. L'Ostîr al à ancje vût il plasê di tignî a batesim chest libri propite a Gjalarian.

### MA CE ISAL DENTRI, DI PRECÎS?

Une storie semplice e biele, che in chescj timps dulà che no si rive adore a parâsi dal razism e dulà che il spirt cristian al pâr jessi lâ a platâsi, nus conte di un emigrant (e no di un imigrât, come che sin usâts). **Adam, par câs, al finìs par discuvierzi che il Friûl nol è dome il puest dulà che al stâ cirint fortune - lant a vendi strafaniçs pes cjasis - ma al è ancje la tiere di dulà che a son i soi vons.** E anzit... al rivarà propit a Gaeran, paisut de basse furlane, dulà che al cjatarà Zuan. Di chi, il rapuart tra Zuan e Adam, al met lidrîs, e si capissarà che intes diferencis si plate la sioretât di spirt e di cûr.

### **MA A CUI PUEDIÂL PLASÊ?**

A ducj chei che a àn voie di sintisi contâ une storie semplice, che e cjacare di bogns sintiments, e dulà che l'unic vêr antagonist al è il timp e il vivi, che a passin e a cambin par ducj. No si à di spietâsi maraveis narativis, ma **scletece, tenerece e semplicitât di chê gjenuine.** Al è une vore util ancje par chei che ur plasarès lei par furlan ma a son inmò insigûrs, stant che al è il talian subit daûr.

.

### **E SE O AI VOIE DI CJOLILU?**

Al è un libri che lu si cjate lant a cjatâ l'autôr o magari chei de Pro Loco di Gjalarian. Si pues in ogni câs cjapâ une cerce [achì su Contecurte](#).